



N°144  
Entrée le 03.01.2024  
Chambre des Députés  
Déclarée recevable  
Président de la Chambre des Députés  
(s.) Claude Wiseler  
Luxembourg, le 03.01.2024  
Chambre des Députés

Claude WISELER  
President vun der  
Chamber vun den Deputéierten  
19, um Krautmaart  
L-1728 Lëtzebuerg

Lëtzebuerg, den 02/01/2024

Här President,

**Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Minister fir Finanzen weiderzeleeden.**

An der Seance publique n° 8 vum 20ten Dezember 2023 ass de Gesetzesprojet 8343 gestëmmt ginn. Duerch dëse Vote vun der Chamber gëtt de Steuerbarème am Januar 2024 ëm 4 Indexranchen ugepasst. Duerch dës Upassung sinn d'Berechnung vun de Steuer-Avancë fir d'Joer 2024, déi nach op de Jore virdrun opbauen, net adaptéiert. Konkret bezuelen déi betraffe Leit ze héich Avancen, obwuel hinne bewosst ass, dass se duerch dës Adaptéierung manner bezuele missten. E proaktiivt adaptéiert Zréckbezuele géif Strofzënsen mat sech bréngen an ass domat och net wierklech eng envisagéierbar Optioun. Et stellt sech also d'Fro wéi een déi betraffe Bierger kann ënnerstëtzen.

An deem Zesammenhang wéilt ech dem Minister dës Froe stellen:

1. Ginn et Iwwerleeunge säitens dem Ministère d'Steuer-Avancë vun de betraffene Leit nei ze berechnen an hinnen nach am éischten Trimester 2024 eng passend Kommunikatioun ze schécken?
2. Falls nee: Ginn et Iwwerleeunge säitens dem Ministère d'Strofzënsen an engem Fall vu proaktivem adaptéierten Zréckbezuelen ze annulléieren?
3. Falls nee: Net adaptéiert Steuer-Avancë féieren héchstwarscheinlech zu méi héije Réckbezuelungen un déi betraffe Stéit. Wéi ee Montant ass fir dës konkrete Kontext am Budget virgesinn?

Mat déiwem Respekt,

GOERGEN Marc  
Deputéierten





LE GOUVERNEMENT  
DU GRAND-DUCHÉ DE LUXEMBOURG  
Ministère des Finances

**Äntwert vum Finanzminister, Gilles Roth, op d'parlamentaresch Fro n°144 vum 3. Januar 2024 vum éierbaren Deputéierte Marc Goergen**

Wéi et am Artikel 135 vum Akommesteiergesetz (L.I.R) virgesinn ass, gi Steueravancë prinzipiell op Basis vun der leschter Besteuerung festgesat. Desweidere kann d'Steierverwaltung d'Avancen upasse, wann Elementer bekannt sinn, déi eng Reduktioun oder eng Erhéijung rechtfäerdeg. Eng allgemeng automatesch Upassung vun den Avance wéinst e.a. enger Adaptatioun vum Barème oder dem Entfale vun enger Indexbranche ass net virgesinn.

Net adaptéiert Steuer-Avancë féieren net onbedéngt zu méi héije Réckbezielungen un déi betraffe Stéit, virun allem wann ee berücksichtegt, datt op der enger Säit d'Avancen op Basis vun der leschter Besteuerung festgesat goufen (z.B. d'Steierjoer 2022 oder 2021), wou déi professionell Revenue fir d'Steierjoer 2024, bedéngt duerch d'Indexéierung, gegebenefalls méi héich ausfale wäerten, an datt op der anerer Säit de Steuerbarème fir d'Steierjoer 2024 ëm 4 Indexbranchen ugepasst gouf.

Esou soll de Steuerzueler sech un de leschten Tableau vun den Avancen halen, deen hie vun der Steierverwaltung geschéckt kritt huet. Zënse gi gerechent, wann de Steuerzueler d'Echeance vun de festgesaten Avancen net respektéiert. Den uewegenannten Akommesteierartikel gëtt awer dem Steuerzueler d'Méiglechkeet iwwert de Wee vun enger motivéierter Ufro seng Avancen upassen ze loossen, falls seng steierlech Situatioun sech wesentlech verännert.

Am Fall wou et bei engem « proaktiv adaptéierten Zeréckbeziele » vun den Avancë säitens dem Steuerzueler zur Fixatioun vun Zënse kënnt, a sech effektiv sollt erausstellen, datt déi initial fixéiert Avancen ze héich waren, gesäit den Artikel 155 (4) L.I.R. vir, datt bei all Reduktioun vun der Steuer e Recalcul vun den Zënse stattfënnt.

Am groussherzogleche Reglement vum 22. Dezember 1981 zum Artikel 155(4) L.I.R. gëtt weider präziséiert wat d'Avancë betrëfft, datt bei esou engem Recalcul vun den Zënse d'Imputatioun vun der Reduktioun vun der Steuer ob all eenzel Echeance vun den Avancë gläichméisseg verdeelt gëtt fir de Remboursement ze rechnen.

Et ass och keng Fro vu Budget dee misst virgesi ginn, vu datt d'Reckbezielung iwwert dee selwechten Article budgétaire leeft iwwert deen d'Steieren och era kommen.

Lëtzebuerg, den 18. Januar 2024

De Finanzminister

(s.) Gilles Roth